

Dr Zaliha akan tentukan tarikh sesuai untuk taklimat

Oleh MUKHRIZ MAT HUSIN  
SHAH ALAM

**M**enteri di Jabatan Perdana Menteri (Wilayah Persekutuan), Dr Zaliha Mustafa akan menentukan tarikh sesuai bagi mendengar taklimat siasatan dalaman berhubung salah laku perolehan projek bernilai jutaan ringgit di Dewan Bandaraya Kuala Lumpur (DBKL).

Jelasnya, siasatan dalaman kes itu kini sudah berada di peringkat akhir.

"Saya akan tentukan tarikh sesuai untuk mendengar taklimat itu yang dijangka diadakan secepat mungkin.

"Saya pasti ramai yang tahu Suruhanjaya Pencegahan Rasuah Malaysia (SPRM) juga sedang menyiasat kes ini dan kita akan beri kerjasama sepenuhnya kepada pihak penguat kuasa yang bertanggungjawab," katanya

selepas majlis perasmian Karnival Sukan sempena Hari Wilayah Persekutuan 2025 pada Sabtu.

Media sebelum ini melaporkan DBKL menjalankan siasatan dalaman berhubung dakwaan salah laku seorang ahli lembaga penasihat yang dikaitkan dengan pemberian projek bernilai RM4 juta.

Maimunah dilapor mengesahkan siasatan itu dan sedang bekerjasama rapat dengan unit integriti DBKL.

Dakwaan salah laku membabitkan ahli lembaga penasihat itu mula tular di media sosial sejak hujung bulan lalu.

Ia membabitkan pelanggaran proses tadbir urus berkaitan perolehan projek kerja penerbitan bahan kreatif untuk DBKL bernilai RM4 juta, yang didakwa tidak diberikan melalui tender terbuka.

# Siasatan projek DBKL kini di peringkat akhir

Sementara itu beliau berkata, kaedah pemberian lesen bazar Ramadan di ibu negara tahun ini akan dijalankan secara telus termasuk cabutan undi petak dilaksanakan oleh DBKL.

Katanya, DBKL dalam peringkat akhir memuktamadkan peniaga di bazar Ramadan.

Menurutnya, setakat ini hanya 20 hingga 30 peratus yang belum mengisi permohonan tapak dan ia masih dibuka kepada mereka yang berminat untuk berniaga di musim Ramadan.

"Tahun ini sebanyak lebih 3,000 petak perniagaan disediakan di Kuala Lumpur.

"Kita membuka ruang sepenuhnya kepada mereka yang betul-betul ada hasrat untuk berniaga dan meningkatkan pendapatan di bulan Ramadan untuk (menyambut) Aidilfitri," katanya.



Dr Zaliha (dua dari kanan) menandatangani skrin digital simbolik perasmian Karnival Sukan sempena sambutan Hari Wilayah Persekutuan 2025 di Kompleks Sukan Mokhtar Dahari Presint 18.